

**MUHAMAD NADZRI** Mohamed Noor  
Universiti Kebangsaan Malaysia

## **PILIHAN RAYA DAN POLITIK MALAYSIA PASCA PRU 2018: PERSAINGAN, DINAMIK DAN IMPLIKASI**

### ***ELECTIONS AND POLITICS IN MALAYSIA POST GE 2018: CONTESTATIONS, DYNAMICS AND IMPLICATIONS***

*Situasi politik dan pilihan raya di Malaysia, selepas kejatuhan Barisan Nasional (BN) dalam Pilihan Raya Umum ke-14 (PRU 14), sangat menarik untuk diperhatikan. Terdapat empat Pilihan Raya Kecil (PRK) yang diadakan pada separuh penggal kedua 2018, selepas PRU 14. BN dan pembangkang tewas di kesemua PRK itu dengan agak mudah kepada kerajaan baharu, Pakatan Harapan (PH). Namun dalam tahun 2019, fenomena yang berbeza berlaku. BN telah memenangi semua PRK yang ditandinginya (kecuali PRK Sandakan) meskipun mendapat tentangan yang hebat dari PH. Artikel ini, untuk itu, diasaskan untuk menelusuri dan menganalisis perkembangan politik Malaysia pasca PRU 2018 berfokuskan kepada dinamik persaingan parti di dalam sembilan PRK yang diadakan dari pertengahan 2018 ke penghujung 2019. Berdasarkan laporan media dan kajian kepustakaan, artikel ini membahaskan bagaimana sistem pilihan raya Malaysia yang bersifat multiparti sejak 2015 (persaingan antara BN, PH dan PAS) berubah dan kembali kompetitif bermula awal 2019, selepas mengalami kesuraman dalam separuh penggal kedua 2018. Artikel ini turut memberi refleksi terhadap implikasi dan dinamik politik Malaysia kontemporari dan ke arah PRU ke-15, dengan pecahan ideologi dan budaya yang semakin ketara di kalangan masyarakatnya sejak PRU 14.*

**Kata kunci:** *Pilihan Raya Kecil, Malaysia Baharu, Pakatan Harapan, Barisan Nasional, Muafakat Nasional, Pilihan Raya Umum 2018*

*The development of electoral politics in Malaysia, after the fall of Barisan Nasional (BN) in the 14th General Election (GE-14), is both dynamics and fascinating. The new opposition, now led by BN has lost, rather easily, in all of the four by-elections held in the last six months of 2018. But intriguingly in 2019, BN has managed to make a huge come back by winning all of the elections its contested despite being fiercely challenged by the new ruling party, the Pakatan Harapan (PH). This article, therefore, aims to explore and analyse*

*the political development in the new Malaysia with the focus on the dynamics of party competition in the nine by-elections held in 2018 and 2019, respectively. Based on media reporting and library research, this article argues on the return of a two-coalition party system in Malaysia in 2019 with the materialisation of a formal pact between two major opposition party – BN and Pan-Malaysia Islamic Party (PAS). This article also provides some reflections on the dynamics and implications of the current politics in Malaysia, and towards GE-15 with growing ideological and cultural divisions among the populace since GE-14.*

**Keywords:** *By-elections in Malaysia, Malaysia Baharu, Pakatan Harapan, Barisan Nasional, Muafakat Nasional, GE-14 Malaysia*

## **Pendahuluan**

Kekalahan mengejut Barisan Nasional (BN) dalam Pilihan Raya Umum ke-14 (PRU 14) telah memberi kesan besar kepada parti gabungan itu dan sistem parti di Malaysia. Presiden parti itu, Najib Abdul Razak telah ditekan untuk berundur, begitu juga pengganti beliau Ahmad Zahid Hamidi pada lewat 2018. Satu demi satu wakil rakyat Barisan Nasional khususnya dari parti Pertubuhan Kebangsaan Melayu Bersatu (UMNO), mengumumkan untuk meninggalkan parti itu sama ada untuk menyertai parti pemerintah atau menjadi perwakilan bebas. Terdapat empat Pilihan Raya Kecil (PRK) yang telah diadakan dalam tahun 2018 selepas Pakatan Harapan (PH) menguasai Putrajaya sejak 10 Mei 2018. Calon-calon PH telah memenangi keempat-empat PRK itu dengan agak mudah kerana parti pembangkang bukan sahaja tidak bersatu, tetapi juga melemah tanpa hala tuju yang jelas dari pucuk pimpinannya. Kesemua parti komponen BN meninggalkan gabungan parti itu, kecuali *Malaysian Chinese Association* (MCA) dan *Malaysian Indian Congress* (MIC), menjelang hujung tahun 2018.

Namun hal ini berubah, apabila Mohamad Hasan dilantik untuk mengepalai UMNO dan BN sejak awal 2019. Berbeza dengan Ahmad Zahid yang sentiasa mencari konsensi politik dengan PH, Mohamad melihat perlunya BN untuk direkayasa semula sebagai pembangkang baharu yang kuat dalam berhadapan dengan kerajaan PH dan menyaingi mereka dalam pentas politik dan pilihan raya di masa hadapan. Beliau menggerakkan kerjasama yang kukuh dengan Parti Islam Se-Malaysia (PAS), yang gagal dilaksana oleh Najib dan Zahid. Dalam masa yang sama, dengan personaliti yang terbuka, pragmatik dan bersahaja, beliau mampu menyakinkan MIC dan MCA untuk bukan sahaja menerima pakatan mereka dengan PAS, tetapi untuk kekal di dalam BN.

Dengan menyusur sentimen identiti dan masalah ekonomi semasa – Mohamad Hasan, BN dan PAS mula menyaingi kerajaan PH dengan lebih

tersusun, komited dan agresif. Pakatan pembangkang baharu yang pragmatik ini membuah hasil yang baik bukan sahaja kepada mereka tetapi juga kepada perubahan sistem parti di Malaysia sejak awal 2019. BN+PAS memenangi keempat-empat PRK yang ditandingi dalam 2019. Malah, BN berjaya merampas kerusi PH di Dewan Undangan Negeri (DUN) Semenyih dan Parlimen Tanjung Piai. Dengan permantapan pakatan baharu pembangkang, sistem parti di Malaysia kini kembali dikukuhkan dengan sistem dua parti gabungan. Ia menjadikan persaingan politik dan pilihan raya kembali sengit dan sukar dijangka. Ia membuka ruang dan memberi alternatif kepada rakyat untuk memilih dua jalur utama ideologi dalam memandu masa depan politik Malaysia, iaitu ideologi demokrat atau konservatisme, persis amalan politik di Amerika Syarikat dan di Barat.

Perbincangan di bahagian kesimpulan ini, untuk itu, dipecahkan kepada tiga bahagian utama. Pertama, perbincangan teoritikal dilakukan dalam memahami corak pengundian dan dinamik pilihan raya Malaysia dari perspektif pluralisme dan regionalisme. Kedua, sebuah ikhtisar dilakukan ke atas praktik dalam persaingan pilihan raya kecil di Malaysia pada 2018 dan 2019. Ketiga, sebuah refleksi dibuat terhadap implikasi dan dinamik politik Malaysia kontemporari ke arah Pilihan Raya Umum ke-15. Hal ini bertujuan untuk memberi refleksi terhadap dinamika persaingan pilihan raya di Malaysia dibawah pentadbiran baharu Mahathir bersama PH, dan seterusnya membincangkan implikasinya di dalam praktik semasa politik Malaysia.

## **Pluralisme dan Regionalisme dalam Pilihan Raya Malaysia**

Pluralisme adalah karektor utama sistem sosial Malaysia. Didasari oleh dasar pecah dan perintah penjajahan Inggeris di Malaysia selama lebih satu abad, pluralisme mempengaruhi pelbagai sub-sistem kehidupan bermasyarakat di negara ini termasuk di dalam ekonomi, pendidikan dan cara hidup. Ia tidak pula semata-mata dari sudut etnik, budaya dan agama, tetapi juga kelas dan ideologi. Pembangunan Malaysia pascakolonial yang tidak seimbang merencamkan lagi pluralisme dengan faktor kewilayahan.<sup>1</sup> Perbincangan dan analisis ke semua pilihan raya kecil (PRK) sepanjang setahun setengah era Malaysia Baharu banyak menghubungkan faktor pluralisme dan regionalisme. Hal ini pula mempunyai hubungan dinamik tingkah laku pengundi, situasi semasa, strategi parti dan kekuatan parti serta calon yang bertanding.

Dari sudut kerangka teori tingkah laku pengundi, terdapat tiga tingkah laku utama pengundi di Malaysia merentas kemajmukan masyarakatnya. Ada yang mengundi atas faktor identifikasi parti,<sup>2</sup> ada juga dari sudut sosiologikal,<sup>3</sup> dan yang lain pula secara pilihan rasional.<sup>4</sup> Namun hal ini pula tidaklah statik, sebaliknya juga merespon kepada situasi semasa di peringkat lokal, nasional dan kepartian. Dalam menyorot kajian lepas tentang fenomena pertukaran rejim di Malaysia melalui PRU 2018, tulisan Gomez dan Mohamed Nawab,<sup>5</sup> serta

Muhamad Nadzri menekankan bagaimana perpecahan elit mempengaruhi corak pengundian dan keputusan PRU itu.<sup>6</sup> Calon dan parti yang dilanda isu semasa yang besar pula, mungkin boleh diboikot oleh pengundi setia dalam sesebuah pilihan raya. Loh dan Netto, misalnya, melihat masalah pentadbiran Najib sebagai punca penolakan rakyat terhadap BN.<sup>7</sup> Dalam konteks yang sama, Muhammad Ariff dan Sity menekan kegagalan dasar ekonomi-politik Najib, atau *Najibnomics* sebagai pendorong penolakan rakyat terhadap pentadbirannya.<sup>8</sup> Hal ini selaras dengan karya Dettman dan Weiss yang melihat kekangan dalam politik penaungan rejim Najib.<sup>9</sup> Sebaliknya dari sudut kepimpinan, faktor kredibiliti Mahathir Mohamed sebagai bekas perdana menteri, diujahkan oleh Walid sebagai hal penting telah membantu PH untuk mendapat kerusi sokongan tambahan yang membolehkan parti itu ke Putrajaya.<sup>10</sup> Begitu juga dengan faktor strategi dan kewujudan pakatan antara parti.<sup>11</sup> Hal ini membolehkan pakatan pembangkang menembusi kawasan majoriti Melayu dan Sabah serta Sarawak.<sup>12</sup>

Sintesis dari dialektika pluralisme dan regionalisme pula membahagikan kawasan-kawasan pilihan raya di Malaysia kepada beberapa kategori berdasarkan dinamik hubungan antara etnik, kelas dan wilayah.<sup>13</sup> Secara amnya, daerah-daerah pilihan raya di Malaysia boleh dibahagikan kepada lima kawasan. Kawasan pertama adalah kawasan majoriti Melayu/Bumiputera di Pantai Timur Semenanjung Malaysia. Lebih 90 peratus kerusi di kawasan ini adalah kerusi majoriti Melayu dengan sesetengahnya lebih dari 75 peratus. Dari sudut sejarah dan regionalisme pilihan raya, negeri Kelantan didominasi oleh PAS. Parti-parti lain sukar untuk menembusi negeri itu melainkan jika PAS mengalami krisis legitimasi moral sebagaimana yang berlaku dari 1974 ke 1989. Hal ini berikutan kecenderungan orang Melayu di negeri itu yang menyukai kepimpinan ulama. Pendidikan dan pergerakan dakwah Islam secara rasmi dan tidak rasmi yang banyak digerakkan oleh PAS secara meluas dan berakar umbi (*rootedness*) di negeri itu menganjurkan masyarakat Melayu tempatan untuk menyokong parti itu.<sup>14</sup> PAS juga mempunyai pengaruh yang tinggi di Terengganu dan kekuatan yang agak signifikan di Pahang. Oleh itu, pertembungan pilihan raya di Terengganu selalunya kompetitif, tetapi sering kali melibatkan PAS dan UMNO/BN sahaja. Di Pahang, BN mempunyai kelebihan berbanding PAS khususnya di kawasan pinggiran bandar dan di kawasan majoriti Melayu yang bersaiz sederhana.<sup>15</sup>

**Jadual 1. Keputusan Pilihan Raya Umum ke-14 (2018) mengikut negeri.**

NEGERI	PKR	BN	PAS	DAP	WARISAN	BEBAS	SOLIDARITI	JUMLAH
PERLIS	1	2	0	0	0	0	0	3
KEDAH	10	2	3	0	0	0	0	15
KELANTAN	0	5	9	0	0	0	0	14
TERENGGANU	0	2	6	0	0	0	0	8
PULAU PINANG	11	2	0	0	0	0	0	13
PERAK	13	11	0	0	0	0	0	24

PAHANG	5	9	0	0	0	0	0	14
SELANGOR	20	2	0	0	0	0	0	22
KUALA LUMPUR	10	0	0	0	0	1	0	11
PUTRAJAYA	0	1	0	0	0	0	0	1
NEGERI SEMBILAN	5	3	0	0	0	0	0	8
MELAKA	4	2	0	0	0	0	0	6
JOHOR	18	8	0	0	0	0	0	26
LABUAN	0	1	0	0	0	0	0	1
SABAH	3	10	0	3	8	0	1	25
SARAWAK	4	19	0	6	0	2	0	31
<b>JUMLAH</b>	<b>104</b>	<b>79</b>	<b>18</b>	<b>9</b>	<b>8</b>	<b>3</b>	<b>1</b>	<b>222</b>

Sumber: Suruhanjaya Pilihan Raya Malaysia.

Kawasan kedua adalah kawasan majoriti Melayu Pantai Barat Semenanjung. Di kawasan luar bandar yang selalunya juga kawasan majoriti Melayu, UMNO/BN sering mempunyai kelebihan melain di sesetengah kawasan di Kedah. Namun dengan proses permodenan dan perbandaran yang pesat, banyak kawasan-kawasan yang dahulunya dikategorikan kawasan luar bandar telah ditransformasi kepada kawasan pinggir bandar, ini sekaligus merubah corak dan dinamik pengundian kawasan itu. Faktor perpecahan parti berasaskan etnik Melayu juga boleh memberi kesan kepada dominasi UMNO sebagaimana yang berlaku di Johor dan Kedah dalam PRU-2018.

Kawasan ketiga pula adalah kawasan pinggir bandar. Dalam PRU 2018, kawasan ini adalah kawasan yang paling kompetitif di mana persaingannya adalah sangat terbuka di antara BN dan PH khususnya PKR. Kawasan seperti ini umumnya juga adalah kawasan kerusi-kerusi campuran di mana majoriti etnik di kawasan-kawasan itu tidak melebihi dua pertiga dari etnik minoriti setempat. Sebagai parti pelbagai etnik tetapi berteraskan politik Melayu, PKR sering bertanding di kawasan ini menentang calon Melayu dan bukan Melayu dari BN. Dengan penambahan pesat kawasan ini atas faktor perbandaran, begitu juga dengan pengaruh PKR di kawasan ini. Hal ini dibuktikan dengan dominasi PKR di Selangor sejak PRU 2008 dan kemenangan parti itu dan PH di Negeri Sembilan dan Melaka pada PRU 2018.

Wilayah pilihan raya yang ketiga pula adalah kawasan bandar. Kawasan ini kebanyakannya didominasi oleh etnik Cina dari sudut jumlah meskipun terdapat juga beberapa bandar yang dikuasai oleh etnik Melayu khususnya di Pantai Timur dan beberapa negeri di utara Semenanjung. Etnik Cina sebagai etnik minoriti yang penting, menguasai pelbagai sektor ekonomi negara, umumnya bersifat kritikal dan rasional dalam membuang undi. Ketika parti Gerakan (BN) menguasai Pulau Pinang sebelum PRU 2008, amalan pecah undi biasa undi biasa diamalkan oleh pengundi Cina negeri itu. Di peringkat negeri pengundi Cina mengundi BN, tetapi di peringkat nasional mereka mengundi *Democratic Action Parti* (DAP). Praktik ini adalah untuk memaksimumkan kepentingan etnik itu. Adalah penting memenangkan BN di peringkat negeri bagi memastikan projek pembangunan dan peruntukan

kewangan dari kerajaan pusat yang dikuasai oleh BN ketika itu terus disalurkan ke negeri itu. Dalam masa yang sama, dengan menghantar wakil DAP ke Parlimen, mereka percaya suara mereka akan dibawa ke dewan perundangan itu dengan lebih jelas dan lantang berbanding oleh ahli parlimen BN. Namun sikap ini tidak statik, sejak PRU 2008 hingga PRU 2018, pengundi Cina di kebanyakan kawasan bandar di Malaysia mula memberi sokongan yang kuat kepada DAP dan pembangkang. Ini menyebabkan parti majoriti Cina BN seperti MCA dan Gerakan mula hilang populariti secara signifikan. Kawasan bandar lewat dasawarsa ini, dengan penolakan ramai orang Cina yang semakin meluas, mula menjadi kubu kuat DAP.

Wilayah yang kelima adalah Sabah dan Sarawak. Berbanding negeri-negeri di Semenanjung (kecuali Kelantan), sentimen kenegerian warga Sabah dan Sarawak adalah agak menebal. Penduduknya rata-rata adalah agak kritikal dengan kerajaan pusat dan orang Semenanjung. Namun, kebanyakan kerusi di negeri-negeri ini adalah kerusi pinggir dan luar bandar. Kebergantungan rakyatnya terhadap pembangunan dan bantuan dari kerajaan adalah tinggi. Untuk itu, politik pembangunan yang sering digunakan oleh BN dan parti komponennya di peringkat negeri, bersama-sama dengan strategi-strategi lain, cenderung mendapat tempat di kalangan pengundi sehinggakan ramai menganggap negeri-negeri ini sebagai 'simpanan tetap' BN. Namun pecahan elit yang mendasar di dalam UMNO pada lewat 2015 telah membolehkan parti baharu di Sabah, Parti Warisan Sabah yang dipimpin oleh bekas pemimpin kanan UMNO Shafie Apdal untuk menumpaskan UMNO melalui PRU 2018 dan praktik lompat parti. Justeru, kekuatan BN di Sarawak berbanding di Sabah sebelum dan semasa PRU 2018 boleh dijelaskan dari sudut kesepakatan elit negeri dengan elit persekutuan. Kesepakatan itu utuh di Sarawak dibawah pentadbiran Najib, sebaliknya longgar di Sabah semasa penggal kedua pentadbiran Najib dan pentadbiran Mahathir yang pertama.

Hubungan kompleks pluralisme-regionalisme ini memperlihatkan tiada satu parti yang boleh menguasai kerajaan persekutuan kerana kekuatan parti masing-masing berbeza di wilayah yang berbeza. DAP tidak popular di kawasan luar bandar, PAS pula hampir tiada tempat di Sabah dan Sarawak. UMNO/BN juga mengalami kesukaran untuk memenangi kerusi di kawasan bandar sejak PRU 2008. Persaingan tiga penjurong dalam PRU 2018 telah memberi kelebihan kepada PH berbanding BN dan juga PAS. Dinamik ini turut menggarisbawahi praktik sembilan pilihan raya kecil yang telah diadakan di Malaysia sejak PRU 2018 sehingga ke penghujung 2019.

### **Pilihan Raya Malaysia 2018: Kelebihan PH dalam Sistem Pelbagai Parti**

Hubungan dinamik pluralisme-regionalisme dan pilihan raya *majoritarian* membuatkan praktik parti gabungan sebagai sesuatu yang penting dan perlu dalam politik Malaysia. Barisan pembangkang yang kurang bersatu

merupakan salah satu punca yang membolehkan BN bertahan lebih enam dekad dan terbentuknya sistem satu parti dominan sebelum ini (1955-2008). Dalam sistem ini, parti pembangkang sukar untuk mengatasi BN kerana orientasi politik mereka tertumpu kepada sebahagian golongan pengundi dan wilayah sahaja. Ada kalanya parti pembangkang di era ini bersaing sesama mereka, sekali gus memecahkan undi pembangkang atau undi anti-BN. Ini berbeza dengan parti gabungan BN yang mempunyai 13 parti komponen dengan menggabung pelbagai parti berasaskan etnik dan wilayah. Dengan politik antara-etnik (*inter-ethnic*) sebagai strategi utama, BN di waktu ini tidak mengalami masalah untuk mendapat sokongan ramai dan golongan *middle ground*.

Di bawah kepimpinan Anwar Ibrahim dan isu semasa yang mengimpak khasnya isu sara hidup yang semakin tidak terjangkau oleh umum, parti pembangkang yang berpakat secara longgar dalam PRU 2008 buat pertama kalinya berjaya menafikan undi dua pertiga BN di Parlimen. Meskipun parti pembangkang tidak sepenuhnya bergabung dalam PRU 2008, tetapi kerjasama erat dilakukan untuk mengkoordinasi strategi terhadap BN untuk mengelakkan persaingan sesama mereka, dan membolehkan situasi satu lawan satu (BN dan wakil parti pembangkang) di kebanyakan kawasan pilihan raya. Mereka memperkukuhkan pakatan mereka dengan menubuhkan gabungan pembangkang baru yang dinamakan Pakatan Rakyat (PR). Mulai itu pembangkang dikoordinasikan melalui PR termasuk di dalam aspek pilihan raya. Ini sekaligus membentuk dan memperkukuh sistem dua parti gabungan di Malaysia. Sistem seumpama ini membuatkan persaingan pilihan raya menjadi lebih kompetitif. Dalam PRU 2013, kerusi BN berjaya dikurangkan oleh pembangkang dan pakatan pembangkang buat pertama kalinya memenangi undi popular dalam sejarah pilihan raya di Malaysia.

Hal ini berubah apabila golongan konservatif menguasai PAS pada pertengahan 2015 selepas pemergian Mursyidul Amnya Nik Abdul Aziz Nik Mat. Kerjasama politik gabungan di dalam PR yang berasaskan prinsip kesederhanaan dan pragmatisme digagalkan dengan kebangkitan politik konservatif PAS dibawah dominasi Abdul Hadi Awang. Akibatnya PR berpecah dan persaingan multi-parti berlaku di dalam PRU 2018. Namun, BN juga mengalami masalah yang besar, termasuk perpecahan elit yang mendalam. Ia telah menyebabkan beberapa tokoh utama BN termasuk Mahathir Mohamad dan Muhyiddin Yassin menubuhkan parti baharu (Parti Pribumi Bersatu Malaysia-Bersatu) bagi menyaingi UMNO bersama-sama parti pembangkang baharu Pakatan Harapan. Kerajaan BN juga masih mengalami kesukaran untuk mencari dasar dalam membuatkan bebanan kos sara hidup lebih boleh diterima umum selain turut mengalami krisis legitimasi moral melalui skandal 1MDB. Kecanggihan teknologi internet dan komunikasi (ICT) melalui beberapa aplikasi terbaharu seperti *What's App*, *Telegram* dan *Facebook live* pula membolehkan propaganda BN di media massa dicabar bukan sahaja oleh

parti pembangkang tetapi oleh rakyat dan *netizens*.<sup>16</sup> Atas faktor-faktor ini, persaingan tiga penjujur telah memberikan kelebihan kepada PH berbanding BN, meskipun parti pembangkang boleh mencatatkan kemenangan yang lebih tinggi sekiranya PAS bersama mereka. Sebagai mana yang diujahkan oleh Muhamad Nadzri, persaingan keupayaan PH untuk memperkasa kekuatan parti itu dengan penuh pragmatik, antaranya dengan mengkoodinasi pembangkang dan membentuk parti Melayu yang baharu (Bersatu), persaingan di peringkat persekutuan secara praktiknya bukanlah persaingan tiga penjujur dalam erti kata yang sebenar, sebaliknya lebih kepada persaingan berdasarkan sistem 2+1 parti. □ Parti yang ketiga, iaitu PAS, dalam persamaan ini, boleh diketepikan di peringkat persekutuan, meskipun PAS adalah relevan di negeri-negeri majoriti Melayu di Semenanjung.

Memasuki ke era Malaysia Baharu, pihak pembangkang khasnya BN mengalami disilusi yang ketara ekoran kekalahan mengejut dalam PRU 2018. Tidak lama selepas pengunduran Najib sebagai presiden UMNO, pemilihan UMNO dilakukan dan pemangku presiden Ahmad Zahid Hamidi, dipilih untuk menjawat jawatan Presiden UMNO yang baharu. Namun, UMNO dibawah Zahid tidak mempunyai hala tuju yang jelas. Beliau dilihat cuba untuk membawa UMNO untuk berunding dan berkolusi dengan PH khasnya dengan Mahathir dan PPBM. Dalam masa yang sama, permuafakatan juga cuba dibuat dengan PAS. Sikap Zahid yang tidak tegas dan masih disilusi menyebabkan pemimpin dan parti itu bergerak tanpa arah. Akibatnya kesemua parti komponen BN mengisytihar keluar dari gabungan itu kecuali MCA dan MIC. Beberapa tokoh penting UMNO di Semenanjung dan Sabah juga mengumumkan keluar parti dan kebanyakan mereka menyertai Bersatu. Terdapat empat pilihan raya kecil (PRK) yang diadakan pada penggal kedua tahun 2018 iaitu di Sungai Kandis (Ogos), Balakong (September), Seri Setia (September) dan Port Dickson (Oktober). Pembangkang di bawah kepimpinan Zahid kalah teruk di kesemua kawasan itu, sebahagiannya disebabkan oleh masalah kepimpinan dan perpecahan parti pembangkang. Hal ini adalah paling ketara di dalam PRK Sungai Kandis. Meskipun Parti Keadilan Rakyat (PKR/PH) memperoleh kemenangan yang besar di kawasan itu dalam PRU 2018, namun jumlah undi popularnya menurun dengan ketara dari 23,998 undi kepada 15,427 sahaja dalam PRK itu.<sup>18</sup> Hal ini berikutan penurunan jumlah turun mengundi yang ketara dalam PRK itu. Sebaliknya jika parti pembangkang dapat memberikan kepimpinan dan kerjasama yang efektif, khasnya dengan mendapatkan semula undi BN dan PAS sebagaimana di dalam PRU 2018, calon PH sebenarnya boleh ditewaskan.

Begitu juga dalam PRK Sri Setia di Selangor, jika kolaborasi PAS dan BN boleh berkempen dengan lebih efektif dan mengekalkan jumlah sokongan sebagai mana dalam PRU 2018, mereka berpeluang untuk menewaskan PH yang sokongannya terkesan dari peratusan turun mengundi yang rendah. Peratusan yang rendah ini boleh dijangkakan kerana PRU 2018 baharu sahaja

berlangsung beberapa bulan yang lalu. Keputusan PRK ini juga tidak memberi impak kepada kedudukan PH di peringkat negeri buat penyokong parti itu. Dari sudut kompleks pluralisme-regionalisme pula, kedua-kedua kawasan ini adalah kawasan Melayu Pantai Barat yang terdedah dengan arus permodenan yang tinggi. Ramai daripada mereka merupakan pengundi yang kritikal dan ramai yang anti-BN khasnya sejak PRU 2008. Mereka juga masih teruja dengan kewujudan kerajaan baharu yang telah mengumumkan beberapa *goodies* pilihan raya seperti pemansuhan GST, kawalan harga bahan bakar dan penangguhan pembayaran PTPTN.

Situasi yang hampir sama berlaku di sebalik kejayaan PH di Balakong - melibatkan kawasan bandar majoriti Cina. Dengan jarak PRU 2018 dan PRK Balakong hanya bersengkang empat bulan, sentimen pengundi Cina kepada PH kekal dan tidak berubah meskipun sebahagian daripada mereka tidak turun mengundi. Menariknya, meskipun MCA disokong oleh PAS, namun jumlah undi yang diperoleh adalah jauh lebih sedikit berbanding PRU 2018. Ini berikutan krisis politik semasa yang melanda BN dibawah kepimpinan Zahid. MCA bertindak untuk bertanding atas nama parti sendiri buat pertama kali sejak merdeka. Hal ini mungkin telah menjarakkan pengundi Melayu UMNO dan PAS daripada menyertai PRK dan mengundi MCA. Situasi ini memberi pengajaran kepada MCA bahawa keadaan mereka adalah lebih buruk jika mereka bertindak bersendirian, walaupun di kawasan majoriti Cina. Untuk itu, keupayaan PH untuk mengekalkan kedudukan di ketiga-tiga ini adalah sesuatu yang boleh dijangka. Namun apa yang ketara adalah, kerjasama longgar BN dan PAS turut membuahkan hasil dengan kemampuan mereka menurunkan majoriti kemenangan PH khasnya di Sungai Kandis dan Sri Setia.

Keadaan adalah agak berbeza di PRK Port Dickson. Berbanding dengan tiga PRK sebelum yang diadakan berikutan kematian penyandang, PRK Port Dickson diadakan kerana perletakan jawatan penyandanganya bagi membolehkan Ketua Umum PKR dan PH, Anwar Ibrahim, untuk kembali ke Parlimen. Meskipun kerusi yang dipilih adalah antara kerusi paling selamat untuk Anwar ke Parlimen, terdapat beberapa faktor penting yang lain yang membolehkan PH mendapat majoriti yang lebih besar dalam PRK Port Dickson berbanding keputusan kerusi parlimen itu sewaktu PRU 2018. Pertama, melibatkan faktor ketokohan dan kredibiliti Anwar sebagai politikus berpengaruh di kalangan umum. Kedua, BN mengambil keputusan untuk tidak bertanding, memperlihatkan hasrat kepimpinan UMNO/BN yang mahukan Anwar untuk kembali ke Parlimen secara tidak langsung pada ketika itu. Hal ini telah menyebabkan pemimpin UMNO tempatan, Isa Samad untuk bertanding di atas tiket bebas. Dalam masa yang sama, PAS juga meletakkan calon. Perpecahan pembangkang ini menyebabkan mereka bersaing sesama sendiri dengan jentera dan hala tuju yang tidak tersusun. Ia juga diburukkan lagi dengan kehadiran ramai calon bebas di dalam PRK ini. Kesemua faktor ini menjelaskan kemenangan besar yang dicapai oleh Anwar bukan sahaja

berbanding kerusi parlimen yang sama pada PRU 2018, tetapi juga berbanding dengan ketiga-tiga PRK sebelum ini.

## **Politik Malaysia 2019: Kebangkitan Pembangkang Baharu dan Pengukuhan Semula Sistem Dua Parti Gabungan**

Namun dinamik persaingan PRK pada tahun 2019 adalah jauh sekali berbeza berbanding tahun yang sebelumnya. Dua faktor utama menggarisbawahi situasi ini. Pertama, BN dan PAS telah menjalinkan kerjasama yang lebih utuh, dengan membuat pakatan dan kerjasama dari atas ke bawah di antara kedua-dua parti itu. Meskipun gabungan rasmi BN dan PAS dimaterai pada pertengahan September 2019, pakatan jitu antara parti-parti itu telah disemai sejak lewat 2018 di bawah kepimpinan sementara Mohamad Hasan.

Kedua, kerajaan baharu PH yang dipimpin oleh Mahathir menghadapi beberapa dilema dan cabaran dalam melaksana reformasi dan janji-janji pilihan raya. Isu kos sara hidup, isu utama di kalangan rakyat terbanyak, tidak dapat ditangani dengan berkesan oleh kerajaan baharu. Masalah ini tidak semata-mata berpunca dari kekurangan dana, tetapi juga penerusan amalan kapitalisme kroni sebagaimana praktik regim lama. Oleh itu masalah ini, secara tuntasnya adalah cabaran governans ekonomi politik.<sup>19</sup> Kedua, kesukaran dalam reformasi perkara-perkara non-material berikutan ideologi masyarakat Malaysia yang terpecah-pecah, seringkali atas jalur identiti dan wilayah. Di Semenanjung, pecahan ideologi konservatisme dan liberalisme adalah cukup ketara, dengan kebanyakan Melayu mementingkan penerusan tradisi dan status quo dan kebanyakan bukan Melayu menekankan nilai baharu dan progresif.

Justeru apabila terdapat sesuatu pembaharuan dasar non-material yang diumumkan oleh kerajaan PH, satu pihak akan menuduh ia terlalu progresif dan menolak tradisi, dan satu pihak pula akan berpandangan sebaliknya. Usaha untuk menolak diskriminasi kaum oleh PH dengan mengiktiraf *International Convention on the Elimination of all forms of Racial Discrimination* (ICERD) dan menolak jenayah terhadap kemanusiaan dengan mengiktiraf Statut Rom telah ditolak oleh sesetengah etnik Melayu hasil dari usaha berkesan UMNO dan PAS secara berterusan. Bimbang akan kehilangan populariti khasnya di kalangan etnik Melayu yang merupakan majority utama pengundi, kerajaan PH yang dipimpin Mahathir akhirnya menarik balik pengiktirafan Malaysia ke atas ICERD dan Statut Rom dengan sokongan kuat parti Bersatu yang bercita-cita tinggi untuk mengambil-alih peranan UMNO sebagai parti berasaskan Melayu terbesar di Malaysia.

Birokrat dan sektor awam yang didominasi oleh etnik Melayu juga memberikan cabaran kepada PH dalam melaksanakan reformasi. Penglibatan beberapa pensyarah dan penjawat awam dalam menggagalkan pengiktirafan Malaysia ke atas Statut Rom menyebabkan persepsi terdapatnya ‘daulah terpendam’ (*deep state*) di dalam struktur pentadbiran negara hangat

diperkatakan, termasuk oleh Menteri Luar Saifuddin Abdullah.<sup>20</sup> ‘Daulah terpendam’ juga boleh memerihalkan bagaimana beberapa dasar lama seperti undang-undang *Security Offences (Special Measures) Act* (SOSMA) terus dikekalkan dan digunapakai oleh kerajaan baharu. Perspektif kerajaan baharu terhadap beberapa undang-undang *draconian* juga kelihatan berjaya diubah oleh ‘daulah terpendam’ dengan melihat itu sebagai sesuatu yang ‘perlu’ berbanding sesuatu yang ‘adil’ atau ‘menindas’ sebagai mana manisfesto pilihan PH.<sup>21</sup>

Terdapat lima pilihan raya kecil yang diadakan di Malaysia sepanjang 2019. Pilihan raya itu adalah PRK Cameron Highlands (Januari), Semenyih (Mac), Rantau (April), Sandakan (Mei) dan Tanjung Piai (November). Menariknya, PH tewas di kesemua PRK ini kecuali di Sandakan, di mana BN dan PAS tidak bertanding. Apa yang lebih menarik adalah pakatan BN dan PAS berjaya merampas kembali kerusi pilihan raya Semenyih dan Tanjung Piai yang dimenangi PH pada PRU 2018. Perkembangan ini adalah menarik kerana bukan sahaja BN memenangi semua PRK yang ditandingi dalam tahun 2019, tetapi mereka mampu melakukannya dalam keadaan PH mendominasi kerajaan persekutuan dan kerajaan negeri (kecuali Pahang) di kawasan-kawasan PRK itu berlangsung - yang selalunya memberi kelebihan kepada pihak penyandang untuk mengekalkan kedudukan. PH pula meskipun cenderung menggunakan taktik politik pembangunan, dengan mengumumkan projek pembangunan sewaktu berkempen, tetapi kesannya dapat dihadkan dengan pemantauan SPR dan oleh media secara agresif menyebabkan penyalahgunaan kuasa oleh pihak pemerintah adalah lebih terkawal berbanding rejim sebelum.<sup>22</sup>

Di Cameron Highlands, undi BN dalam PRU 2018 hanya berkelebihan kira-kira 500 undi sahaja dari PKR (PH), meskipun politik wang berleluasa ketika pilihan raya itu berlangsung.<sup>23</sup> Dengan pemilihan semula melalui PRK pada Januari 2019, PH sepatutnya berkelebihan untuk memenangi PRK ini, lebih-lebih lagi dengan kedudukan PH sebagai kerajaan persekutuan. Malah kedudukan ini digunakan PH tanpa segan untuk menarik pengundi melalui politik pembangunan (melakukan projek pembangunan sekiranya menang),<sup>24</sup> penggunaan jentera kerajaan,<sup>25</sup> dan politik ancaman/ugutan kepada warga setempat.<sup>26</sup> Sebaliknya, BN berjaya mempertahankan kedudukan dalam PRK Cameron Highlands. Dari sudut regionalisme politik dan pluralisme Malaysia, kawasan luar bandar di Semenanjung (kecuali di Kelantan dan Terengganu) yang didominasi etnik bumiputera seperti di Cameron Highlands selalunya memberi kelebihan kepada BN. Apatah lagi dalam PRK ini PAS, telah menggerakkan jentera dan sokongan kepada BN menyebabkan berlakunya pertambahan undi yang ketara kepada BN. Namun faktor lain turut signifikan dalam membantu kemenangan BN dalam PRK ini termasuklah pemilihan calon yang bersesuaian oleh BN yang memilih Orang Asal/Asli sebagai calon dengan satu pertiga pengundi dari etnik itu, jaringan penaungan yang telah lama dibentuk BN di kawasan itu dan kedudukan BN sebagai kerajaan negeri.

Keputusan PRK di DUN Semenyih dan Parlimen Tanjung Piai adalah lebih memberansangkan buat UMNO/BN kerana parti itu berjaya merampas kembali kedua-dua kerusi dari Bersatu/PH, yang cuba memprojeksi organisasi itu sebagai parti baharu Melayu dan pengganti UMNO. Di DUN Semenyih, undi majoriti yang diperolehi calon Bersatu/PH pada PRU 2018 adalah hampir 9000 undi. Namun dalam PRK Semenyih yang diadakan pada Mac 2019, BN merampas kembali DUN itu dengan bantuan undi dari penyokong PAS khususnya di pusat daerah mengundi majoriti Melayu (dua pertiga pengundi di kawasan ini adalah Melayu), dan dalam masa yang sama sokongan kepada PH mengalami penurunan yang signifikan dari 23,428 undi (2018) kepada 17,866 sahaja (2019). Kawasan pinggir bandar di Lembah Klang sememangnya kawasan yang kompetitif dalam pilihan raya Malaysia sejak PRU 2008. Janji perubahan khasnya kawalan terhadap kos sara hidup menarik ramai pengundi di DUN ini untuk memberi kemenangan besar kepada PH dalam PRU 2018. Namun setelah hampir setahun PH menguasai Putrajaya, perubahan sosio-ekonomi yang diharapkan oleh pengundi tempatan yang rata-rata berulang ke tempat kerja di sekitar Lembah Klang, khasnya penghapusan tol antara bandar dan pengurangan harga petroleum, tidak dapat dilaksanakan sepenuhnya oleh kerajaan baharu. Dalam masa yang sama, politik identiti yang dimainkan oleh UMNO dan BN dalam beberapa dasar kerajaan turut memberi kesan dalam membangkitkan sentimen yang kurang baik di kalangan sesetengah pengundi Melayu terhadap PH.

Di Tanjung Piai pula, kekalahan PH adalah lebih dramatik. Menang dengan majoriti kecil (524 undi) pada PRU 2018, tetapi tewas kepada BN dengan 15,086 undi pada PRK yang diadakan pada November 2019. Berbeza dengan Semenyih, Parlimen Tanjung Piai adalah kawasan campuran dengan majoriti pengundi Melayu lebih 50 peratus dan etnik Cina merupakan minoriti penting dengan hampir 42 peratus pengundi. Kemenangan BN pada kali ini juga tidak dibantu secara ketara oleh undi penyokong PAS yang kecil jumlahnya (sekitar 3000 undi sahaja pada PRU 2018) di kawasan ini, sebaliknya ia merupakan mesej penting pengundi yang tidak berpuas hati dengan pentadbiran dan dasar PH di Putrajaya, terutamanya kesukaran PH untuk menunaikan janji pilihan raya dan pengenalan dasar-dasar yang tidak popular. Akibatnya, parti pemerintah mengalami defisit kepercayaan yang tinggi di Tanjung Piai dengan mencatatkan kekalahan di kesemua pusat daerah mengundi (PDM) yang ditandinginya kepada BN, sesuatu yang jarang berlaku kepada parti pemerintah sebelum ini.

BN juga dengan pragmatik dan muafakat, membenarkan calon MCA Wee Jeck Seng untuk mewakili parti itu meskipun terdapat usaha untuk meletakkan calon dari UMNO. Kelebihan Wee sebagai tokoh tempatan, pernah mewakili parlimen itu sebanyak beberapa kali yang membolehkan beliau membina jaringan sosio-politik dengan pengundi setempat dari pelbagai etnik dengan baik. Ini memerihalkan mengapa beliau hanya tewas

tipis dari calon PH pada PRU 2018 di sebalik penolakan pengundi kepada BN ketika itu adalah cukup tinggi. Pengundi Cina di Malaysia juga terkenal dengan sikap pengundian rasional dalam membentuk tingkah laku perwakilan mereka.<sup>27</sup> Kemenangan Wee bukan sahaja tidak memberi apa-apa kesan kepada kedudukan PH di Putrajaya, dalam masa yang sama ia boleh memberi peringatan dan pengajaran terhadap PH supaya lebih responsif dan serius dalam menangani masalah rakyat dan mengotakan janji. Sentimen anti-PH di kalangan sesetengah Melayu juga bukan sahaja berterusan, tetapi terus bertambah dengan signifikan sepanjang tahun 2019, selaras dengan kesukaran pentadbiran PH dibawah Mahathir untuk melakukan perubahan yang mendasar. Hal ini membolehkan BN mencatatkan kemenangan di kawasan campuran yang kebanyakannya memberi kelebihan kepada PH dalam PRU 2018.

BN juga berupaya mempertahankan kerusi di DUN Rantau dengan agak mudah pada April 2019. Sebagaimana di Tanjung Piai, DUN Rantau juga adalah kerusi campuran dengan 52 peratus adalah pengundi Melayu, India 27.53 peratus dan Cina 18.81 peratus. Bakal Perdana Menteri ke-8 (berdasarkan persefahaman PH) dan Ahli Parlimen Port Dickson, Anwar Ibrahim mengetuai kempen PH dalam PRK itu, dalam menghambat kedudukan pemangku Presiden UMNO, Mohamad Hasan dari kawasan itu. Namun sebagai tokoh besar di peringkat negeri dan tempatan sejak 2004, dan kerjasama daripada PAS, di samping masalah yang menyelubungi kerajaan baharu, PH tidak mampu memberi cabaran besar untuk BN, khasnya di kawasan PDM majoriti Melayu. Melalui struktur pengaruh (*soft power*) yang dimiliki Mohamad di kalangan penduduk setempat, beliau tidak menghadapi masalah untuk mengekalkan kedudukan di DUN itu dengan baik meskipun cuba dicabar oleh struktur kuasa (*hard power*) dengan cukup intensif oleh parti pemerintah.

PRK Sandakan yang diadakan pada Mei 2019 pula menawarkan dinamika persaingan pilihan raya yang berbeza berbanding PRK-PRK lain yang diadakan pada tahun 2019. Turut terkesan dari dinamik pluralisme-regionalisme politik Malaysia, negeri Sabah adalah antara negeri yang kurang maju di Malaysia. Untuk itu darjah kebergantungannya terhadap bantuan dan sumber pembangunan dari kerajaan, kedua-dua di peringkat persekutuan dan negeri, bagi penduduk daerah setempat adalah tinggi. Untuk itu, terdapat kecenderungan yang signifikan untuk pengundi untuk memilih parti pemerintah, kerana tingkah laku mereka distrukturkan oleh masalah kebergantungan pembangunan, lebih-lebih lagi di kalangan Bumiputera. Namun berbeza dengan kawasan yang mempunyai majoriti Cina yang besar di Sabah, sebagai mana di kawasan-kawasan lain di Malaysia, undi di kawasan sedemikian tidak begitu mudah untuk didapati kerana kebanyakan etnik Cina bekerja sendiri atau di sektor swasta. Mereka rata-rata kurang bergantung dengan kerajaan dalam hal kelangsungan hidup mereka dan lebih bebas (*independent*) daripada pengaruh parti pemerintah. Satu lagi hal yang menarik di Sabah adalah politik budaya (perkauman) bukan sahaja kurang popular, tetapi rata-rata ditolak oleh

warga Sabah secara umum. Sebaliknya, politik kenegerian lebih mendapat tempat di kalangan mereka.

Sentimen anti-BN ketara di Sandakan sejak PRU 2004 di kawasan campuran dengan etnik Cina sebagai kumpulan terbesar (hampir 50 peratus). Malah calon bebas (Chong Hong Ming) berjaya menewaskan BN di dalam PRU 2004. Sentimen ini berterusan sejak PRU 2008 di mana sokongan majoriti sering diperolehi DAP, dengan penambahan majoriti sehingga ke PRU 2018. Namun BN yang menguasai kerajaan negeri ketika itu turut memberi cabaran yang baik, dengan kebanyakan undi dari golongan Muslim Bumiputera. Dengan DAP kini membentuk sebahagian daripada kerajaan negeri dan persekutuan, kelebihan untuk parti untuk mendapat undi Muslim Bumiputera yang cenderung menyokong parti pemerintah bertambah. Dalam masa yang sama, politik berasaskan perkauman ditolak dengan keras oleh rata-rata warga Sabah yang melihat ia sebagai ancaman kepada solidariti semasa mereka. BN dan PAS yang menyokong Parti Bersatu Sabah (PBS), pembangkang utama dalam PRK ini, dilihat menjuarai politik sedemikian di Semenanjung dan ditolak tegas oleh pengundi khususnya di kalangan etnik Cina dan non-Muslim yang sering dijadikan sasaran tidak langsung politik perkauman di Semenanjung. BN dan UMNO Sabah juga adalah organisasi yang paling terkesan selepas PRU 2018 berlansung. BN Sabah mengalami pepecahan parti dan ramai ahli perundangan Sabah menyertai parti Bersatu. Ketiadaan BN yang merupakan aktor utama dalam politik Sabah sejak 1990an secara langsung dalam PRK Sandakan 2019 juga membolehkan PH mencatatkan majoriti yang lebih tinggi walau jumlah undi keseluruhannya lebih rendah, ekoran dari sokongan terhadap pembangkang yang jatuh merudum.

### **Persaingan Pilihan Raya Malaysia Pasca PRU 2018 dan Implikasinya dalam Politik Malaysia Kontemporari**

Perkembangan politik Malaysia pasca PRU 2018 dibawah kepimpinan Mahathir kini menunjukkan perjalanan yang berliku, tidak *linear* dan penuh kesamaran. Namun dua terdapat dua hal utama yang jelas. Pertama, pengukuhan sistem dua parti gabungan dengan kerjasama kukuh BN dan PAS sejak awal 2019. Kedua, pepecahan ketara masyarakat dengan garis ideologi yang tegar di antara golongan ‘konservatif’ dan ‘liberal’, selaras dengan dua paksi utama politik Malaysia kini – PH dan BN+PAS, persis persaingan politik dan ideologi di dalam politik Amerika. Hal ini cukup reflektif dengan pecahan undi popular pada PRU 2018, di mana PH menguasai 50 peratus, dan bakinya oleh BN (32 peratus) dan PAS (18 peratus).

Faktor utama pengukuan perpecahan sosio-politik ini berkaitan rapat dengan kesukaran pentadbiran baharu Mahathir untuk merealisasikan janji reformasi dengan bermakna.<sup>28</sup> Masalah kos sara hidup yang menjadi isu utama pilihan raya sejak PRU 2008, tidak dapat ditangani PH dengan berkesan.<sup>29</sup>

Malah pentadbiran Mahathir dari ke masa kesemasa meremeh-remehkan manifesto pilihan raya yang dibuat PH pada sebelum PRU 2018, seringkali menggambarkan janji-janji itu sebagai kurang realistik.<sup>30</sup> Dalam masa yang sama terdapat juga beberapa dasar baharu yang dirasakan terlalu terkehadapan seperti ICERD dan Statut Rom,<sup>31</sup> serta pengenalan dasar-dasar yang dianggap remeh dan tidak diperlukan seperti penggunaan kasut hitam dan pengenalan tulisan Jawi bagi melengkapi pengajaran subjek Bahasa Melayu di sekolah.<sup>32</sup> Akibatnya masyarakat Malaysia dari pelbagai latar belakang mula meragui kepimpinan PH menjelang tahun 2019, dan PH perlahan-lahan menghadapi defisit kepercayaan sesetengahnya masyarakat khususnya di kalangan bumiputera, masyarakat luar bandar dan golongan muda sejak itu.<sup>33</sup>

Hal ini dilengkapi dengan kewujudan baru gabungan pembangkang di antara dua parti konservatif iaitu BN (berasaskan budaya) dan PAS (berasaskan agama). Pakatan BN dan PAS menjuarai isu identiti Melayu dan Islam dan memainkan peranan yang penting dalam mencipta keraguan, kegusaran serta politik kebencian khasnya di kalangan Melayu Islam terhadap PH.<sup>34</sup> PH dimomok kepada golongan Melayu di Malaysia oleh BN dan PAS sebagai kerajaan yang dipimpin DAP, liberal dan anti-Islam.<sup>35</sup> Dasar rentas kaum PH dipolitikkan sebagai anti-Melayu, anti-tradisi dan pro-bukan Melayu.<sup>36</sup> Mana-mana keputusan kerajaan baharu untuk membina masyarakat inklusif dengan dasar multi-budaya akan dihambat dengan permainan politik identiti pemimpin BN dan PAS, yang cuba mengukuhkan kedudukan dan menjatuhkan PH.<sup>37</sup> Perlantikan golongan bukan Melayu dalam institusi utama kerajaan, meskipun atas faktor merit dan kredibiliti, sering diperburukkan pemimpin konservatif. Dasar ICERD menerima layanan yang sama dari mereka. Malah BN dan PAS memainkan peranan penting dalam memobilisasi kemarahan Melayu terhadap ICERD dan Statut Rom yang menyebabkan kedua-dua dasar itu ditarik balik.<sup>38</sup> Kesukaran PH dalam melaksanakan perubahan ekonomi yang fundamental menyebabkan praktik politik identiti yang dimainkan BN dan PAS mudah mendapat tempat di kalangan golongan yang tidak berpuas hati dengan prestasi PH.

Dalam merespons kepada hal yang membimbangkan PH ini, parti pemerintah khasnya golongan konservatif dalam Bersatu mula menari mengikut rentak pembangkang dan memainkan sentimen Melayu. Prinsip inklusiviti, integriti politik dan politik rentas kaum mula dikorban Bersatu secara perlahan-lahan dalam menghadapi realiti baharu politik Malaysia pasca PRU 2018. Dalam kes pusingan-U ICERD umpamanya, pemimpin Bersatu bertanggungjawab dalam memberikan tekanan dalaman supaya kerajaan PH menarik balik dasar itu.<sup>39</sup> Objektifnya adalah Bersatu berhajat untuk menjadi parti utama Melayu, baik melalui jalan hadapan dengan memainkan politik identiti seperti UMNO dan PAS, dalam usaha mendapat populariti di kalangan Melayu.<sup>40</sup> Ataupun melalui 'pintu belakang' dengan merekrut pemimpin pembangkang khasnya UMNO di peringkat persekutuan dan negeri.

Kemasukan beramai-ramai pemimpin UMNO ke Bersatu bermula tidak lama selepas PRU 2018. Bersatu yang hanya memenangi 13 kerusi parlimen sahaja dalam PRU 2018, sekaligus merupakan antara parti terkecil dalam PH, berupaya menambahkan 13 kerusi menjadikan kesemuanya 26 menjelang setahun PH di Putrajaya. Malah Mahathir dan beberapa pemimpin Bersatu, tanpa segan silu terus mengajak pemimpin pembangkang termasuk UMNO untuk menyertai mereka atas dasar menguatkan kedudukan Melayu di dalam kerajaan.<sup>41</sup> Pemimpin utama Amanah juga mengikut jejak langkah yang sama meskipun memburukkan UMNO dengan pelbagai label sebelum PRU 2018.<sup>42</sup>

Sebagaimana dengan amalan di Barat pada masa kini, media sosial digunapakai sepenuhnya oleh pakatan pembangkang dan sekutunya dengan permainan politik identiti melalui dengan ideologikal dan salah-tafsiran (*misinformation*). Perspektif “Melayu terancam”, “kerajaan Cina” dan “anti-Islam” kerap disebar oleh mereka melalui platform *Facebook* dan *What’s App*, atas nama kebebasan bersuara dan media.<sup>43</sup> Persepsi ini berkesan di kalangan sesetengah Melayu meskipun jawatan-jawatan utama kabinet dijabat oleh pemimpin Melayu. Hal ini bukan sahaja menaikkan sentimen Melayu terhadap kerajaan, tetapi juga persepsi kebencian terhadap etnik lain.<sup>44</sup>

Kebangkitan semula UMNO/BN melalui kerjasama dengan PAS dan kegagalan reformasi berkesan oleh PH menyebabkan Zahid Hamidi dan Najib Razak kembali ke persada politik Malaysia. Zahid kembali menjawat kedudukannya sebagai Presiden UMNO pada Julai 2019 selepas lama mengambil cuti sejak penghujung 2018. Bagi memperkuatkan kedudukannya dan ‘menyelamatkan’ bekas ketuanya, Najib dilantik Zahid sebagai Pengerusi Penasihat Khas BN disaat mereka berdua berhadapan dengan puluhan kesalahan rasuah dan salahguna kuasa di mahkamah. Menggunakan struktur parti UMNO jelas sekali berkelebihan untuk mereka berdua untuk memobilisasi sokongan umum dan simpati ramai, berbanding melakukannya secara bersendirian. Meskipun kehadiran semula mereka kepada BN boleh menggugat kredibiliti pembangkang baharu, namun permainan politik identiti, *misinformation* dan ketidakpuashatian sesetengah Melayu dan sebahagian bukan Melayu terhadap PH mengaburi isu yang melanda Zahid dan Najib. Ini boleh dibuktikan dengan kejayaan BN memenangi kesemua PRK yang ditandinginya dalam 2019, termasuk di kawasan campuran yang menjadi kubu kuat PH dalam PRU 2018. Hal ini turut menunjukkan bahawa peningkatan kebebasan politik tidak semestinya membawa kepada demokratisasi, tetapi juga mobokrasi, sebagaimana kritikan Aristotle.<sup>45</sup> Warganega yang *uninformed*, *misinformed* dan *disinformed* boleh membuat keputusan yang kurang rasional berasaskan sentimen.

Namun terdapat juga implikasi positif, meskipun bercampur-campur, di dalam pembangunan politik Malaysia pasca PRU 2018 setakat ini. Beberapa reformasi politik telah dilakukan dan beberapa projek baharu telah direncanakan. Kebebasan bersuara dan media umpamanya telah mencapai tahap yang lebih

baik berbanding sewaktu rejim BN. Malah badan antarabangsa mengiktiraf kebebasan media di Malaysia adalah yang terbaik di Asia Tenggara pada 2018.<sup>46</sup> Akta Berita Palsu juga pada akhirnya dimansuhkan pada 2019 meskipun mengalami cabaran yang berliku. Pilihan raya juga semakin bebas, dengan semua parti dan calon dibenarkan bertanding, tanpa banyak sekatan, hasil dari pembebasan SPR daripada pengaruh dominan parti pemerintah. Namun, Akta Hasutan masih berkuatkuasa, dan telah digunapakai sekurang-kurangnya dua kali terhadap ahli politik PKR setakat 2019. Meskipun pilihan raya semakin bebas, namun penyalahgunaan sumber awam dan politik pembangunan masih dimainkan oleh parti pemerintah, hampir di dalam semua PRK selepas PRU 2018. Di sebalik praktik ini, terletaknya tangan-tangan konservatif di dalam PH yang memegang kuasa dominan dan undang-undang *draconian*. Untuk adil kepada golongan konservatif di dalam PH, reformasi bukanlah agenda asal mereka dalam menyertai PH, sebaliknya menjatuhkan Najib dan BN dalam PRU-14.

Gabungan BN dan PAS, dikenali sebagai Muafakat Nasional, juga telah berjaya menubuhkan pakatan pembangkang yang ampuh, bersama parti komponennya MCA dan MIC. Kejayaan BN memenangi PRK Tanjung Piai dengan supra-majoriti dan memenangi kesemua PRK yang ditandinginya menunjukkan Muafakat Nasional boleh memberikan gugatan yang besar terhadap PH dengan pengundian rentas kaum. Sistem dua parti gabungan dengan itu secara praktiknya telah kembali ke pentas politik Malaysia, khususnya di Semenanjung. Dengan keperluan untuk Muafakat Nasional untuk mendapatkan sokongan di Sabah dan Sarawak, pakatan itu dijangka akan memainkan politik rentas dan dalam masa yang sama politik identiti, sebagaimana amalan BN di masa lepas. Namun, parti pemerintah, terutamanya Bersatu, telah mengambil beberapa langkah strategik dalam memperkuatkan kedudukannya, termasuk dengan merekrut perwakilan BN ke dalam parti itu, sekali gus mengganggu proses pengukuhan pembangkang dan sistem dua parti gabungan.

### **Kesimpulan: Pesaingan PRU ke-15 masih terbuka**

Di sebalik kejayaan PH menewaskan BN dalam PRU 2018, agenda reformasi tidak dilakukan sepenuhnya oleh kerajaan baharu yang kini dipimpin bekas autokrat, Mahathir Mohamad. Hal ini berikutan, struktur perubahan rejim Malaysia lebih bersifat *quasi-replacement*, dengan kemasukan bekas pemimpin konservatif rejim lama yang mengawal kuasa dominan parti pemerintah melalui pemegangan kuasa penting di dalam kabinet dan pembahagian jawatan yang seimbang dalam kerajaan. Perubahan parti-parti di dalam PH agak ketara khususnya parti Bersatu yang semakin ke kanan dengan ideologi konservatif. *Realpolitik* nampaknya mengatasi prinsip parti itu yang secara berterusan merekrut ahli pembangkang secara terbuka dalam mengembalikan kekuatan

parti Melayu di dalam kerajaan persis amalan rejim lama. Parti terbesar di dalam PH pula semakin melemah di penghujung 2019 dengan kemunculan dua puak utama iaitu golongan pro-Anwar dan golongan pro-Azmin, situasi yang turut memperkukuh kedudukan parti Bersatu.

Pembangkok pula, selepas hilang arah dan hala tuju sepanjang penggal kedua 2018, mula mendapat momentum dengan pakatan antara UMNO dan PAS, kemudiannya diperkukuh dengan pengekalan MCA dan MIC di dalam BN. Pakatan baharu ini, kini dikenali sebagai Muafakat Nasional memenangi kesemua pilihan raya yang ditandingi mereka. Hal ini tidak semata-mata kerana cabaran dalam pelaksanaan janji oleh, dan perpuakkan dalam kerajaan PH, tetapi juga strategi ampuh dan berkesan yang digunapakai oleh Muafakat Nasional dalam memberi cabaran bermakna kepada PH.

Hasilnya sistem dua parti gabungan kembali wujud di Malaysia lewat ini, sekaligus membuka persaingan yang bermakna di antara PH dan Muafakat Nasional pada PRU ke-15 nanti. Namun penggal parlimen yang ke-14 ini hanya akan berakhir pada pertengahan tahun 2023, iaitu kira-kira tiga tahun lagi. Tempoh ini cukup lama untuk kedua-dua parti untuk menyusun strategi dan dasar untuk memenangi pilihan raya itu kelak, sama ada secara demokratik atau sebaliknya. Kerajaan baharu pimpinan Mahathir, dikilas oleh sarjana politik Asia Tenggara William Case, “kelihatan seperti rejim lama”.<sup>47</sup> Malah ada sarjana yang beranggapan “yang bertukar ketika PRU 2018 bukanlah rejim tetapi hanya pentadbiran”.<sup>48</sup> Dalam masa yang sama, untuk menyamakan rejim baharu dengan rejim lama di Malaysia, mungkin adalah reaksi yang agak terlebih. Meskipun terdapat banyak persamaan, terdapat juga perbezaan. Hal ini dapat dirasai umum melalui perlebaran ruang kebebasan asasi yang diberikan oleh kerajaan baharu yang turut diiktiraf badan antarabangsa. Namun terdapat juga gangguan-gangguan terhadap kebebasan asasi yang dilaksanakan oleh kerajaan baharu atas nama keselamatan dan keharmonian negara.

Untuk itu meskipun sistem politik Malaysia adalah lebih demokratik di bawah pentadbiran PH kini, ia merupakan demokrasi yang lemah (a weak democracy), dan masih bersifat hybrid meskipun lebih bebas kini. Melainkan agenda reformasi dijalankan dengan lebih fundamental, termasuk dengan melakukan pendemokrasian agensi awam dan para penjawatnya, sistem politik Malaysia berisiko untuk menghadapi pendemokrasian-balik dibawah pentadbiran Mahathir lebih-lebih lagi jika kedudukan Anwar sebagai Perdana Menteri ke-8 dinafikan, atau sekiranya PH tewas kepada pakatan rejim lama - Muafakat Nasional dalam PRU ke-15.

## Nota Akhir

- 1 Ostwald & Oliver, “Four Arenas: Malaysia’s 2018: Election, Reform, and Democratization”, 2019.
- 2 Campbell et. al., *The American Voter*, 1960.

- 3 Lazarsfeld et. al., *The People's Choice*, 1944.
- 4 Fiorina, *Retrospective Voting in American National Elections*, 1981.
- 5 Gomez and Nawab, Malaysia's 14th General Election and UMNO's Fall: Intra-Elite Feuding in the Pursuit of Power, 2019.
- 6 Nadzri, "The 14th General Election, the Fall of Barisan Nasional, and Political Development in Malaysia, 1957-2018", 2018.
- 7 Loh & Netto (pytn.), *Regime Change in Malaysia: GE14 and the End of UMNO-BN's 60 year rule*, 2018.
- 8 Mohd Ariff Asyurul dan Sity, "Manifesto Barisan Nasional dan Kejatuhan Najibnomics dalam Pilihan Raya Umum Ke-14", 2018.
- 9 Dettman & Weiss, "Has Patronage Lost Its Punch in Malaysia?", 2018.
- 10 Walid Jumlatt, "The Mahathir effect in Malaysia's 2018 election: the role of credible personalities in regime transitions", 2019.
- 11 Muhamad Nadzri, "Persaingan PRU ke-14 di Pahang: Pengekalan status quo melalui pertembungan tiga penjuru", 2019.
- 12 Muhamad Nadzri dan Jamaie, "Politik, Pengundi dan Faktor Melayu/Bumiputera: Analisis Terhadap Kegagalan Barisan Nasional Dalam PRU 2018", 2018.
- 13 Ostwald dan Oliver, "Four Arenas: Malaysia's 2018 election, reform and democratization", 2020. <https://doi.org/10.1080/13510347.2020.1713757>
- 14 Lihat umpamanya, Najwa Abdullah, "Intra-Islamist Competition in Kelantan", 2019. Lihat juga konsep "rootedness" dalam mobilisasi politik dalam, Ufen, "Opposition in Transition: Pre-electoral Coalitions and the 2018 Electoral Breakthrough in Malaysia", 2020.
- 15 Muhamad Nadzri, "Persaingan PRU ke-14 di Pahang: Pengekalan status quo melalui pertembungan tiga penjuru", 2019.
- 16 Tapsell, "The Smartphone as the 'Weapon of the Weak': Assessing the Role of Communication Technologies in Malaysia's Regime Change", 2018.
- 17 Nadzri, "The 14th General Election, the Fall of Barisan Nasional, and Political Development in Malaysia, 1957-2018", 2018.
- 18 Mohd Iskandar & Tharanya, "Mohd Zawawi menang PRK Sungai Kandis", *Berita Harian*, 4 Ogos 2018, <https://www.bharian.com.my/berita/politik/2018/08/457982/mohd-zawawi-menang-prk-sungai-kandis>. [30 November 2019].
- 19 Gomez, "After the change: Business as usual?", *The Star*, 11 Mei 2019, <https://www.thestar.com.my/business/business-news/2019/05/11/after-the-change-business-as-usual>. [30 November 2019].
- 20 "Saifuddin Abdullah: The 'deep state' is trying to undermine Harapan", *Malaysiakini*. 30 Julai 2019, <https://www.malaysiakini.com/news/485916>. gov't. [30 November 2019].

- 21 Lihat umpamanya kenyataan Menteri Pertahanan Mohamad Sabu berkenaan kepentingan untuk mengekalkan Akta Majlis Keselamatan Negara, dalam Yiswarae, “Mat Sabu now says govt rethinking abolishing NSC Act”, 2018.
- 22 Lihat umpamanya, “Tg Piai: Bersih 2.0 kecewa PH salah guna sumber kerajaan pancing undi”, *Free Malaysia Today*, 7 November 2019, <https://www.freemalaysiatoday.com/category/bahasa/2019/11/07/tg-piai-bersih-2-0-kecewa-ph-salah-guna-sumber-kerajaan-pancing-undi/>. [30 November 2019].
- 23 Ahmad Johari, “Amalan rasuah keputusan pilihan raya Parlimen Cameron Highlands terbukti”, *Berita Harian*, 30 November, 2018, <https://www.bharian.com.my/berita/politik/2018/11/503769/amalan-rasuah-keputusan-pilihan-raya-parlimen-cameron-highlands>. [30 November 2019].
- 24 Alagesh & Nik Sukry, “Cameron Highlands lebih membangun jika PH menang”, *BeritaHarian*, 16 Januari 2019, <https://www.bharian.com.my/berita/politik/2019/01/520758/cameron-highlands-lebih-membangun-jika-ph-menang>. [30 November 2019].
- 25 Ng, “PH cakap tak serupa bikin, guna jentera k’jaan – KJ”, *Malaysiakini*. 20 Januari 2019, <https://www.malaysiakini.com/news/460998>. [30 November 2019].
- 26 Lee, “Tok batin tak sokong PH, jangan bayar gaji dia”. *Malaysiakini*. 10 Januari 2019, <https://www.malaysiakini.com/news/459816>, [30 November 2019].
- 27 Crouch et. al., *Malaysian Politics and the 1978 Election*, 1980.
- 28 Teoh, Pakatan slows reforms to court Malay support, *Straits Times*, 24 Mac 2019. <https://www.straitstimes.com/asia/se-asia/pakatan-slows-reforms-to-court-malay-support>. [30 November 2019].
- 29 Sukumaran, “Protest votes, broken promises: Decisive defeat for Malaysia’s ruling coalition in Johor’s Tanjung Piai by-election”. *South China Morning Post*, 17 November 2019, <https://www.scmp.com/news/asia/southeastasia/article/3038085/protest-votes-broken-promises-decisive-defeat-malaysias>. [30 November 2019].
- 30 “Mahathir: Manifesto not bible, only a guide”, *The Sun Daily*, 17 July 2018, <https://www.thesundaily.my/archive/mahathir-manifesto-not-bible-only-guide-nuarch564580>. [30 November 2019].
- 31 Lihat umpamanya, Lim, “Pakatan needs Goldilocks approach to reforms, says academic”, *The Malay Mail*, 2 Jun 2018, <https://www.malaymail.com/news/malaysia/2018/06/02/pakatan-needs-goldilocks-approach-to-reforms-says-academic/1637743>. [30 November 2019].
- 32 Azril, “Maszlee jokes that black shoes were among his ministry’s greatest achievements this year”, *The Malay Mail*, 12 Disember

- 2019, <https://www.malaymail.com/news/malaysia/2019/12/12/maszlee-jokes-that-black-shoes-were-among-his-ministrys-greatest-achievements/1818540>. [15 Disember 2019].
- 33 Kenneth Tee, “Ilham Centre: Pakatan yet to gain Malay votes, failed to manage perception war after GE14”, *The Malay Mail*, 19 September 2019, <https://www.malaymail.com/news/malaysia/2019/09/19/ilham-centre-pakatan-yet-to-gain-malay-votes-failed-to-manage-perception-war/1792226>. [15 Disember 2019].
- 34 Lihat, “Hadi: Isu Tabung Haji agenda tersirat jatuhkan imej Islam”, *Malaysiakini*, 27 Disember 2018. <https://www.malaysiakini.com/news/457888>. [15 Disember 2019].
- 35 Lihat umpamanya, Afriadi, “Propaganda sentimen agama sepanjang setahun PH”, *Sinar Harian*, 9 Mei 2019, <https://www.sinarharian.com.my/article/27264/KHAS/Kerajaan-PH/Propaganda-sentimen-agama-sepanjang-setahun-PH>. [15 Disember 2019].
- 36 Haspaizi Zain, “Sistem perwakilan berkadar untungkan DAP”, *Malaysiakini*, 12 Februari 2020, <https://www.malaysiakini.com/news/510578>. [15 Februari 2020].
- 37 “Malanjum bumiputera, graduan UiTM, tapi masih tak cukup?”. *Malaysiakini*. 12 Julai 2018. <https://www.malaysiakini.com/news/510578>. [15 Disember 2019].
- 38 Tuty Haryanti, “Some 700k Umno, PAS members to attend anti-ICERD rally”, *New Straits Times*, 22 November 2018, <https://www.nst.com.my/news/politics/2018/11/433461/some700k-umno-pas-members-attend-anti-icerd-rally>. [15 Disember 2019].
- 39 Nor Fazlina, “PPBM reiterates rejection of ICERD, says it is ‘unnecessary’”, *New Straits Times*, 17 November 2018, <https://www.nst.com.my/news/politics/2018/11/432227/ppbm-reiterates-rejection-icerd-says-it-unnecessary>. [15 Disember 2019].
- 40 “Kongres Maruah Melayu: Umno dakwa IPTA jadi alat PPBM”, *Free Malaysia Today*, 30 September 2019, <https://www.freemalaysiatoday.com/category/bahasa/2019/09/30/kongres-maruah-melayu-umno-dakwa-ipta-jadi-alat-ppbm/>. [15 Disember 2019].
- 41 Mohd Fahmi, “Dr Mahathir pelawa semua sertai BERSATU”, *Berita Harian*, 5 Julai 2019, <https://www.bharian.com.my/berita/nasional/2019/07/581620/dr-mahathir-pelawa-semua-sertai-bersatu>. [30 November 2019].
- 42 “Mat Sabu pelawa ahli UMNO sertai Amanah”, *Berita Harian*, 16 Disember 2018, <https://www.bharian.com.my/berita/politik/2018/12/509805/mat-sabu-pelawa-ahli-umno-sertai-amanah>. [30 November 2019].
- 43 Nazura, “Awat naratif ‘Melayu terancam’, ‘kebebasan demokrasi’- Mohamad Sabu”. *Berita Harian*, 6 Disember 2019. <https://www.bharian.com.my/berita/nasional/2019/12/635908/awar-naratif-melayu-terancam-kebebasan-demokrasi>

- mohamad-sabu. [30 November 2019].
- 44 “Kerajaan PH: Fenomena baru buat Melayu Islam”, *Harakahdaily*, 18 July 2018, <https://harakahdaily.net/index.php/2018/07/18/kerajaan-ph-fenomena-baru-buat-melayu-islam/> [30 November 2019].
- 45 Brunello, ‘Populist Mobocracy, Fear, and Lies: The Politics of American Populism’, 2019.
- 46 Rashvinjeet, “Malaysia jumps up 22 places in latest Press Freedom index”, *The Star*, 18 April 2019) <https://www.thestar.com.my/news/nation/2019/04/18/malaysia-jumps-up-22-places-in-latest-press-freedom-index>. [30 November 2019].
- 47 Kow, “New M’sia still looks like old version, says academic”, *Malaysiakini*. 2 Mei 2019, <https://www.malaysiakini.com/news/474647>. [30 November 2019].
- 48 Lopez, “GE14 – Regime Change or Regime Maintenance?”, 2019.

## Rujukan

- Ahmad Johari Mohd Ali. 2018. “Amalan rasuah keputusan pilihan raya Parlimen Cameron Highlands terbukti”. *Berita Harian*, 30 November, <https://www.bharian.com.my/berita/politik/2018/11/503769/amalan-rasuah-keputusan-pilihan-raya-parlimen-cameron-highlands> [30 November 2019].
- Afriadi Sanusi. 2019. “Propaganda sentimen agama sepanjang setahun PH”. *Sinar Harian*, 9 Mei, <https://www.sinarharian.com.my/article/27264/KHAS/Kerajaan-PH/Propaganda-sentimen-agama-sepanjang-setahun-PH>. [15 Disember 2019].
- Azril Annuar. 2019. “Maszlee jokes that black shoes were among his ministry’s greatest achievements this year”, *The Malay Mail*, 12 Disember, <https://www.malaymail.com/news/malaysia/2019/12/12/maszlee-jokes-that-black-shoes-were-among-his-ministrys-greatest-achievement/1818540>. [15 Disember 2019].
- Brunello, Anthony R. 2019. “Populist Mobocracy, Fear, and Lies: The Politics of American Populism”. *Inquiries Journal*, 11(2), <http://www.inquiriesjournal.com/articles/1756/populist-mobocracy-fear-and-lies-the-politics-of-american-populism>. [30 November 2019].
- Campbell, A., Converse, P.E., Miller, W.E., & Stokes, D.E. 1960. *The American Voter*. Oxford: John Wiley.
- Crouch Harold A., Kam Hing Lee & Ong, Michael. 1980. *Malaysian Politics and the 1978 Election*. Kuala Lumpur: Oxford University Press.
- Dettman, Sebastian dan Weiss Meredith. 2018. “Has Patronage Lost Its Punch in Malaysia?”. *The Round Table: The Commonwealth Journal of International Affairs*, 107(6), 739-754.
- Fiorina, M.P. 1981. *Retrospective voting in American national elections*. New

- Haven: Yale University Press.
- Francis Kok-Wah Loh & Anil Netto. 2018. *Regime Change in Malaysia: GE14 and the End of UMNO-BN's 60-year Rule*. Petaling Jaya: Strategic Information and Research Development Centre.
- “Hadi: Isu Tabung Haji agenda tersirat jatuhkan imej Islam”. *Malaysiakini*, 27 Disember 2018. <https://www.malaysiakini.com/news/457888>. [15 Disember 2019].
- Gomez, E.T. (2019, May 11). After the change: Business as usual?. *The Star*. <https://www.thestar.com.my/business/business-news/2019/05/11/after-the-change-business-as-usual>. [30 November 2019].
- Gomez, E.T. and Mohamed Nawab Mohamed Osman (pytn.). 2019. *Malaysia's 14th General Election and UMNO's Fall: Intra-Elite Feuding in the Pursuit of Power*. Oxon: Routledge.
- Haspaizi Zain. 2020. “Sistem perwakilan berkadar untungkan DAP”. *Malaysiakini*, 12 Februari, <https://www.malaysiakini.com/news/510578>. [15 Februari 2020].
- “Kerajaan PH: Fenomena baru buat Melayu Islam”. *Harakahdaily*, 18 July 2018, <https://harakahdaily.net/index.php/2018/07/18/kerajaan-ph-fenomena-baru-buat-melayu-islam/> [30 November 2019].
- Kow Gah Chie. 2019. New M'sia still looks like old version, says academic. *Malaysiakini*. 2 Mei 2019, <https://www.malaysiakini.com/news/474647> [30 November 2019].
- Lazarsfeld, P.F., Berelson, B., & Gaudet, H. 1944. *The people's choice*. Oxford: Duell, Sloan & Pearce.
- Lim, Ida. 2018, “Pakatan needs Goldilocks approach to reforms, says academic”, *The MalayMail*, 2 Jun, <https://www.malaymail.com/news/malaysia/2018/06/02/pakatan-needs-goldilocks-approach-to-reforms-says-academic/1637743>. [30 November 2019].
- Lee, Annabelle 2019. “Tok batin tak sokong PH, jangan bayar gaji dia”. *Malaysiakini*, 10 Januari, <https://www.malaysiakini.com/news/459816> [30 November 2019]
- Loh, Francis & Netto, Anil (pytn.). 2018. *Regime Change in Malaysia: GE14 and the End of UMNO-BN's 60-year rule*. Petaling Jaya: Strategic Information Research Development.
- Lopez, Gregory P. 2019. “GE14 – Regime Change or Regime Maintenance?”. 16 December. Public forum conducted by Faculty of Economics & Administration, University of Malaya.
- “Mahathir: Manifesto not bible, only a guide”. *The Sun Daily*, 17 July 2018, <https://www.thesundaily.my/archive/mahathir-manifesto-not-bible-only-guide-nuarch564580>. [30 November 2019].
- “Malanjum bumiputera, graduan UiTM, tapi masih tak cukup?”. *Malaysiakini*. 12 Julai 2018. <https://www.malaysiakini.com/news/433837>. [15 Disember 2019].

- “Mat Sabu pelawa ahli UMNO sertai Amanah”, *Berita Harian*, 16 Disember 2018, <https://www.bharian.com.my/berita/politik/2018/12/509805/mat-sabu-pelawa-ahli-umno-sertai-amanah> [30 November 2019].
- Mohd Ariff Asyrul dan Sity Daud. 2018. “Manifesto Barisan Nasional dan Kejatuhan Najibnomics dalam Pilihan Raya Umum Ke-14”. *JEBAT: Malaysian Journal of History, Politics and Strategic Studies*, 45(20), 343-366.
- Mohd Fahmi Mohd Yusof .2019. “Dr Mahathir pelawa semua sertai BERSATU”. *Berita Harian*, 5 Julai, <https://www.bharian.com.my/berita/nasional/2019/07/581620/dr-mahathir-pelawa-semua-sertai-bersatu> [30 November 2019].
- Mohd Iskandar Ibrahim dan Tharanya Arumugam. 2018. “Mohd Zawawi menang PRK SungaiKandis. *Berita Harian*, 4 August, <https://www.bharian.com.my/berita/politik/2018/08/457982/mohd-zawawi-menang-prk-sungai-kandis>. [30 November 2019].
- Muhamad M.N. Nadzri. 2018. “The 14th General Election, the Fall of Barisan Nasional, and Political Development in Malaysia”, 1957–2018. *Journal of Current Southeast Asian Affairs*, 37(3): 139-171.
- Muhamad Nadzri dan Jamaie.2018. “Politik, Pengundi dan Faktor Melayu/ Bumiputera: Analisis Terhadap Kegagalan Barisan Nasional Dalam PRU 2018”. *JEBAT: Malaysian Journal of History, Politics and Strategic Studies*, 45(20), 386-408.
- Muhamad Nadzri Mohamed Noor. 2019. “Persaingan PRU ke-14 di Pahang: Pengekalan statusquo melalui pertembungan tiga penjuru”, *Geografia: Malaysian Journal of Society and Space*, 15(4): 122-136
- Najwa Abdullah. 2019. “Intra-Islamist Competition in Kelantan”, in Gomez, E.T. and Mohamed Nawab Mohamed Osman (pytn.). 2019. *Malaysia's 14th General Election and UMNO's Fall: Intra-Elite Feuding in the Pursuit of Power*. Oxon: Routledge, Chap. 13.
- Nazura Ngah. 2019. “Awat naratif ‘Melayu terancam’, ‘kebebasan demokrasi’- Mohamad Sabu”. *Berita Harian*, 6 Disember, <https://www.bharian.com.my/berita/nasional/2019/12/635908/awat-naratif-melayu-terancam-kebebasan-demokrasi-mohamad-sabu>. [30 November 2019].
- Ng Xiang Yi. 2019. “PH cakap tak serupa bikin, guna jentera k’jaan – KJ”. *Malaysiakini*, 20 January, <https://www.malaysiakini.com/news/460998> [30 November 2019].
- Nor Fazlina Abdul Rahim. 2018. “PPBM reiterates rejection of ICERD, says it is ‘unnecessary’”, *New Straits Times*, 17 November, <https://www.nst.com.my/news/politics/2018/11/432227/ppbm-reiterates-rejection-icerd-says-it-unnecessary>. [30 November 2019].
- Ostwald, Kai & Oliver, Steven. 2019. “Four Arenas: Malaysia’s 2018: Election, Reform, and Democratization”, *Association of Asian Studies 2019 Conference Paper*.

- Ostwald, Kai dan Oliver, Steven. 2020. "Four Arenas: Malaysia's 2018: Election, Reform and Democratization". *Democratization*, <https://doi.org/10.1080/13510347.2020.1713757>. [31 January 2020].
- Ufen, Andreas. 2020. "Opposition in Transition: Pre-electoral Coalitions and the 2018 Electoral Breakthrough in Malaysia". *Democratization*, 27(2), 167-184.
- Rashvinjeet S. Bedi. 2019. "Malaysia jumps up 22 places in latest Press Freedom index". *The Star*, 18 April, <https://www.thestar.com.my/news/nation/2019/04/18/malaysia-jumps-up-22-places-in-latest-press-freedom-index> [30 November 2019].
- "Saifuddin Abdullah: The 'deep state' is trying to undermine Harapan". *Malaysiakini*, 30 Julai 2019, <https://www.malaysiakini.com/news/485916.gov't> [30 November 2019].
- Sukumaran, Tashny. 2019. "Protest votes, broken promises: Decisive defeat for Malaysia's ruling coalition in Johor's Tanjung Piai by-election". *South China Morning Post*, 17 November, <https://www.scmp.com/news/asia/southeastasia/article/3038085/protest-votes-broken-promises-decisive-defeat-malaysias>. [30 November 2019].
- "Tg Piai: Bersih 2.0 kecewa PH salah guna sumber kerajaan pancing undi". *Free Malaysia Today*, 7 November 2019, <https://www.freemalaysiatoday.com/category/Bahasa/2019/11/07/tg-piai-bersih-2-0-kecewa-ph-salah-guna-sumber-kerajaan-pancing-undi/>. [30 November 2019].
- Tapsell, Ross. 2018. "The Smartphone as the 'Weapon of the Weak': Assessing the Role of Communication Technologies in Malaysia's Regime Change". *Journal of Current Southeast Asian Affairs*, 37(3), 9-29.
- Teoh, Shanon. 2019. "Pakatan slows reforms to court Malay support". *Straits Times*, 24 Mac <https://www.straitstimes.com/asia/se-asia/pakatan-slows-reforms-to-court-malay-support>. [30 November 2019].
- Tee, Kenneth. 2019. "Ilham Centre: Pakatan yet to gain Malay votes, failed to manage perception war after GE14". *The Malay Mail*, 19 September, <https://www.malaymail.com/news/malaysia/2019/09/19/ilham-centre-pakatan-yet-to-gain-malay-votes-failed-to-manage-perception-wa/1792226>. [15 Desember 2019].
- TN Alagesh dan Nik Sukry Ramli. 2019. "Cameron Highlands lebih membangun jika PH menang". *Berita Harian*, 16 Januari, <https://www.bharian.com.my/berita/politik/2019/01/520758/cameron-highlands-lebih-membangun-jika-ph-menang>. [30 November 2019].
- Tuty Haryanti Ahmad Rodzi. 2018. "Some 700k Umno, PAS members to attend anti-ICERDrally". *New Straits Times*, 22 November, <https://www.nst.com.my/news/politics/2018/11/433461/some-700k-umno-pas-members-attend-anti-icerd-rally>. [15 Desember 2019].
- Walid Jumlat Abdullah. 2019. "The Mahathir effect in Malaysia's 2018 election: the role of credible personalities in regime transitions".

*Democratization*, 26(3), 521-536.

Yiswaree Palansamy. 2018. "Mat Sabu now says government rethinking abolishing NSC Act", *The Malay Mail*. 28 Jun. <https://www.malaymail.com/news/malaysia/2018/06/28/mat-sabu-now-says-govt-rethinking-abolishing-nsc-act/1646463> [30 November 2019].

### **Nota Biografi**

Muhamad Nadzri Bin Mohamed Noor (nadzri@ukm.edu.my) adalah Pensyarah Kanan di Program Sains Politik, Universiti Kebangsaan Malaysia (UKM). Beliau juga bertugas sebagai Profesor Adjung di Institut Diplomasi dan Hubungan Luar (IDFR), serta Maktab Pertahanan Angkatan Tentera (MAFDC). Minat kajian beliau adalah politik Asia Tenggara, pilihanraya dan pendemokrasian, serta etnisiti dan nasionalisme.

### **Penghargaan**

Penulis merakam penghargaan kepada UKM kerana memberi beberapa geran dalaman yang menyumbang kepada penyiapan artikel ini iaitu Geran Galakan Penyelidik Muda (GGPM-2018- 022) dan Projek Arus Perdana (AP-2017-001/1).